



“Čarobne” riječi u islamu

“Čarobne” riječi u islamu

U ovim riječima nalazi se i Allahovo ime koje ljudi rijetko izgovaraju i spominju, a nijedan čovjek neće pozvati Allaha ovim imenom, a da mu se Uzvišeni Allah neće odazvati, bez obzira na to o čemu se radilo: bolesti, nafaki, samo ako je u domenu halala. Dakle, ako je dova halal i ako čovjek izgovori ovo Allahovo ime, Allah će mu se odazvati...

Ove “čarobne” riječi jesu sura *Kul huvallahu ehad*, a Allahovo ime koje se nalazi u ovoj suri i kojim Ga je lijepo prizivati u svojim dovama jeste *Es-Samed*. Jednom prilikom Allahov Poslanik, sallallahu alejhi ve sellem, ušao je u džamiju i zatekao nekog čovjeka kako, završavajući namaz, na posljednjem tešehudu, tj. u dovi prije predavanja selama, uči sljedeću dovu:

“ALLĀHUMME INNĪ ES’ELUKE JĀ ALLĀHU BI’ENNEKEL-VĀHIDUL-EHADUS-SAMED ELLEZĪ LEM JELID VE LEM JŪLED VE LEM JEKUN LEHŪ KUFUVEN EHADUN EN TAGFIRE LĪ ZUNŪBI INNEKE ENTEL-GAFŪRUR-RAHĪM! - Allahu, molim Ti se, o Allahu - jer si Ti Jedan, Jedini, Ti si utočište svakom, nisi rodio i nisi rođen, Ti si Onaj kome niko nije ravan - da oprostiš moje grijeha, Ti si, zaista, Onaj koji oprašta, Milostivi!”, pa je Vjerovjesnik rekao: “*Oprošteni su mu grijesi, oprošteni su mu grijesi!*” (Nesai)

Kolika je vrijednost ovih riječi, tj. ove sure, vidimo iz sljedećih predaja:

Abdullah b. Amr prenosi da je Ebu Ejub el-Ensari, radijallahu anhu, dok je jednom prilikom sjedio u kružoku sa ljudima, upitao: “*Zbog čega vam je teško da svaku noć proučite trećinu Kur’ana?*” Ljudi odgovorili: “*Zar neko od nas može svaku noć da prouči trećinu Kur’ana?*” Na to je Ebu Ejub el-Ensari odgovorio: “*Zaista je sura Ihlas (Kul huvallahu ehad) trećina Kur’ana.*” Kada je Allahov Poslanik, sallallahu alejhi ve sellem, čuo ove riječi, rekao je: “*Istinu je rekao Ebu Ejub!*”

Dakle, da bi čovjek ovo postigao, treba da svaku noć jednom prouči Kul huvallahu ehad, i to će se računati kao da je proučio trećinu Kur’ana, a ako prouči tri puta, to se računa kao hatma. Također u vjerodostojnoj predaji prenosi se od Muaza b. Enesa el-Džuheniya, radijallahu anhu, da je Poslanik, sallallahu alejhi ve sellem, rekao: “*Ko prouči Kul-huvallahu ehad deset puta, Allah će mu u Džennetu sagraditi dvorac.*” (Ahmed) Znači, ko prouči ovu suru tri puta, računa mu se kao hatma, a koliko nam treba vremena za to, možda jedna minuta, a hatma nam se upisala u dobra djela, a ko je prouči deset puta, Allah će mu sagraditi dvorac.

Kada je ove riječi čuo Omer, radijallahu anhu, upitao je: “*Hoćemo li povećavati broj svojih dvoraca u Džennetu, o Božiji Poslaniče?*”, a Poslanik, sallallahu alejhi ve sellem, odobri mu riječima: “*Allah ima puno više i ljepše od toga.*” (Ahmed)

Sve što je čovjekov iman veći i sve što više žudi da ima više kod Allaha, sve će više učiti suru Kul

huvallahu ehad.

Preuzeto iz predavanja hfz. Almira Kapića, Studio- FotoHILE
Tekst obradio i prilagodio web portal www.n-um.com